



Monateng : 18 – 20 Junie 2010



Kamp in die winter...kamp
in Junie...dit laat mens wonder hoe koud jy gaan kry en of "Jan-tuisbly-se-warmer-karretjie-ry" nie dalk 'n beter opsie sou wees nie. Maar kamp in die winter het beslis 'n warm identiteit van sy eie.

So het die twee brawe kampkommandant manne, Jacques en Chris, dan ook vroegmiddag op Vrydag al hulle waens by Monateng gaan parkeer (sonder hulle gades wat eers klaar moes werk) en fluks aan die werk gespring en begin kook aan die kerrie-en-rys wat vir aandete beplan is. Later het die sokkerentoesiaste ook almal op datum gehou met die telling tydens die Bafana-Mexico openingswedstryd.

'n Totaal van 8 Rietvalleiers en 2 besoekers het die winter trotseer en kom intrek. Daar was weereens vele kinders – nege om presies te wees. Na boekvat is kerrie-en-rys verkoop en almal was eens dat dit 'n treffer en waarde vir geld was. Die sjerrie het ook

gehulp om die binneste warm te hou. Die lekker van 'n winterskamp is ook natuurlik die gekuier om die kampvure. Chris se "wasmasjien-drom-vuur" het 'n aangename kuier en gesels plek geword.

Saterdagoggend is daar laat eers opgestaan – die wintersonnetjie moes eers die koue verjaag. Slim idees is uitgeruil oor hoe om warm te slaap in jou wa: verwarmers en lugversorgers het baie van die werk gedoen en skynbaar help dit ook baie om die hitte binne te hou as jy die wa se dak laat sak. Die kinders het gebaljaar op 'n hoop bougrond in die pad en verder is daar wild fiets gery en trampolien gespring.

Na middagete was dit tyd vir rugby kyk bo by die lodge...

Saterdagaand het Chris die boekvat om die kampvuur gelei en 'n spesiale inspirerende snit op 'n CD met almal gedeel. Almal was ook baie in hul skik toe Chris aankondig dat die kerkdiens eers om 10:00 sal begin (ons gun

dit maar vir Chris om 'n bietjie laat te slaap – ons kon sien hy kry koud!).

Sondagoggend se diens is weereens op 'n besondere manier deur Jacques gelei. Hy het begin met 'n spesiale boodskap vir die kinders wat aangesluit het by die sokkergees en die landsvlag – vlaggies is op elke kind se wang geverf. Jacques het verduidelik hoe God elkeen se karakter op 'n besondere wyse bou, selfs al beteken dit swaarkry is deel van die groeiproses. Hierna het die gemoedelike atmosfeer, wat aangehelp is deur die warm sonkolle onder die bosveldbome, aangehou deur teetyd en daar is gekuier tot lank na die koek al op was. Party kampeerders het teen middagete begin oppak en ander het onder die bome verder gebly kuier totdat teetyd middagete en saambraaityd geword het.

Vriendelike kamp groete
Mariana



Tjaart en Marietjie het ge-oefen as "Junior" Snr Burgers deur vanaf Woensdag tot Maandag te kamp.

Jaco en Trix het Sondagaand saam agtergebly waarna daar pannekoek gebak is.



Ruan & Marcel word geverf tydens Sondag se erediens





Kamp kommandante: Chris & Lizette en Jaques & Mariana



Aansporingsplaatjie vir 30 Streek is oorhandig aan Jacques en Diana Fourie



Nuwe lede word voorgestel, At en Hennetjie Joubert



Besoekers van Albetros streek in die verre Kaap was Hennie en Ronel Landman met Christiaan en Emma hul kinders (16 en 13 jaar)

Willem, Sonja, Jaco en Johan de Jongh van Kiepersol het ons ook met hul teenwoordigheid vergas.